

CONVENIO DE COLABORACIÓN ENTRE A CONSELLERÍA DE PRESIDENCIA, XUSTIZA E DEPORTES E A FUNDACIÓN SEMANA VERDE DE GALICIA PARA A REDACCIÓN DO PROXECTO TÉCNICO E DIRECCIÓN DAS OBRAS DE MELLORA DAS INSTALACIÓNS EQUINAS DO RECINTO DA FEIRA INTERNACIONAL DE GALICIA

Santiago de Compostela, 2025

REUNIDOS

Dunha parte, Diego Calvo Pouso, conselleiro de Presidencia, Xustiza e Deportes, en nome e representación da Xunta de Galicia, en virtude do Decreto 44/2024 do 14 de abril, polo que se nomean os titulares das consellerías da Xunta de Galicia, no exercicio das facultades que lle confire o artigo 34 da Lei 1/1983, do 22 de febreiro, reguladora da Xunta e da súa Presidencia.

Por outra parte, Ricardo José Durán Rodríguez, na súa condición de Director Xeral da Fundación Semana Verde de Galicia, clasificada como de interese benéfico-privada por Orde do 9 de xullo de 1991 da Consellería da Presidencia e Administración Pública (DOG núm. 138, do 19.07.1991) e declarada de interese galego por Orde do 10 de xullo de 1991 da Consellería de Presidencia e Administración Pública (DOG núm. 140 do 23.07.1991), figurando inscrita co número de rexistro 1991/5, e que intervén por conta e en representación da devandita fundación, con capacidade para vinculala neste acto por acordo adoptado polo Padroado da Fundación en reunión celebrada o 12 de decembro de 2013, elevado a público en virtude de escritura autorizada ante o notario Manuel Barros Gallego o 27 de decembro de 2013, co número 1.336 do seu protocolo.

As persoas reunidas actúan no exercicio dos seus cargos e, na representación que exercen, recoñécense capacidade para obrigar nos termos do presente convenio de colaboración, e para o efecto

EXPOÑEN

Primeiro. Conforme ao establecido no Estatuto de Autonomía de Galicia, a Comunidade Autónoma galega asume a competencia exclusiva en materia de promoción do deporte (artigo 27.22), correspondéndolle á Consellería de Presidencia, Xustiza e Deportes, as competencias de elaboración, proposta e execución da política do goberno galego en materia de deportes, conforme ao establecido no Decreto 136/2024, do 20 de maio (DOG núm. 101, do 27 de maio), polo que se fixa a estrutura orgánica da Consellería de Presidencia, Xustiza e Deportes.

Segundo. A Fundación Semana Verde de Galicia (FSVG) constituída como fundación de interese xeral galego e sen ánimo de lucro, ten personalidade xurídica propia e plena capacidade de obrar, consonte a Lei 12/2006, de 1 de decembro, de fundacións de interese galego.

Entre os seus fins, constan nos seus Estatutos promover a cooperación público-privada no desenvolvemento de actividades feirais e promocionais no campo agrario, alimentario, industrial e comercial co obxecto de impulsar o avance continuo dos devanditos sectores; reforzar a posición estratéxica de Galicia como plataforma feiral para o desenvolvemento de grandes eventos sectoriais de ámbito estatal e internacionais; o impulso e promoción do Recinto Feiral de Galicia en Silleda como un enclave estratéxico para o desenvolvemento socioeconómico de Galicia, e en particular, como infraestruturas de promoción e exposición comercial.



A Fundación Semana Verde de Galicia é o ente que xestiona o maior Recinto Feiral da Comunidade Autónoma, a Feira Internacional de Galicia.

Terceiro: En cumprimento dos seus obxectivos, a Fundación estableceu relacións coa Federación Hípica Galega, co ánimo de definir posibles vías de colaboración que permitan a celebración de actividades deportivas e formativas no recinto Feira Internacional de Galicia.

A hípica é, a día de hoxe, un dos grandes deportes de Galicia, cunha evolución en positivo só lastrada pola falla de grandes instalacións deportivas para a súa práctica.

A Federación Hípica Galega quere ampliar as posibilidades de crecemento deste deporte en Galicia cubrindo as carencias de infraestruturas que condicionan esa positiva evolución, e plantea dotar á Comunidade dunha instalación deportiva de calidade para a práctica de disciplinas ecuestres que permitan optar á organización de Campionatos de España, celebrar probas de carácter internacional e converterse en centro de formación e tecnificación para adestradores e deportistas.

Esta infraestrutura permitiría á Federación Hípica Gallega avanzar en tres obxectivos prioritarios a curto-medio prazo: mellorar a formación dos/as nosos/as deportistas; garantir o benestar dos cabalos (a Federación será pioneira en España coa posta en marcha dunha vogalía específica dedicada ao control do benestar dos cabalos de escola e competición), e aumentar a presenza de Galicia na competición de alto nivel.

Así, o centro permitiría albergar eses proxectos deportivos de competición, dotaría á federación dun escenario de seu para formación e tecnificación (claves para sentar posición), e contribuiría a impulsar deporte que é a demais un potente motor económico.

Por último, dispor destas instalacións de calidade, que permitan acoller concursos atractivos e de primeiro nivel permitiría facer realidade o empeño da Federación de converterse en punto de unión das federacións do centro e norte de España e máis de Portugal, facilitando o fluxo de deportistas nas dúas direccións, brindando alternativas aos nosos deportistas de disciplinas como o salto ou a doma, é dicir, ao 90 % dos practicantes.

A Federación Hípica Gallega contan cunha amplísima experiencia na organización de competicións hípcas e de formación en todas as disciplinas que a integran, especialmente en salto de obstáculos e en doma clásica, que aglutinan o 90% dos practicantes.

Cuarto. As infraestruturas da Feira Internacional de Galicia reúnen as condicións idóneas para poder converterse en referente da hípica galega, tanto por localización como por potencial.

As instalacións hípcas do recinto da Feira Internacional de Galicia situadas no interior del Recinto Feiral da Fundación en Silleda (Pontevedra), na zona gandeira situada na Entrada de Gandería contan con :

- Un ring principal que ten unha superficie útil de 8.500 m², cun aforo máximo de 34.000 persoas, e cunha grada que permite acoller a 1.500 persoas baixo unha superficie cuberta e outras 800 o aire libre, contando con herba natural.
- Unha pista de quecemento o ring anexo cunha superficie de area de 4.100 m².
- Unha zona de caballerizas que dispón de 92 boxes sobre unha superficie bruta de 1.586 m² cun aforo máximo de 2.620 persoas.



Sen embargo, hai que ter en conta que as pistas de hoxe en día, para albergar concursos de primeira orde, preservando o benestar e evitando lesións aos cabalos e xinetes, deben alcanzar uns altos niveis de calidade.

Por elo, sería preciso levar a cabo unha intervención prioritaria e imprescindible consistente na remodelación completa e a fondo das pistas de competición do Recinto Internacional de Galicia para adecualas ás esixencias actuais.

A obra máis importante a executar é a remodelación completa da pista verde e o reacondicionamento da pista actual de area. Ademais, a Federación Hípica Galega encargárase directamente de executar con anterioridade unha obra menor de posta a punto de espazos, e adquirir a maquinaria necesaria para o mantemento das pistas. O resultado final será unha pista de area e geotextil con sistema de rego e desaugadoiro.

Disporíase así dunha pista de última xeración que aportarían unha serie de vantaxes fundamentais no que atinxe á calidade, seguridade e aproveitamento, permitindo o seu uso, aínda en exterior e cun clima como o galego, practicamente durante todo o ano. Para isto, incorporárase un sistema de rego interior que aporta ao chan agarre, elasticidade e, en consecuencia, confortabilidade para o cabalo. Conséguese coa mestura de diferentes fibras con area moi específicas de micro sílice. Así mesmo, a gran vantaxe do rego interior fronte ao aéreo reside en que non hai perda de auga por vento -reducindo o consumo de auga-, e garante a homoxeneidade da humidade entoda a pista, de modo que a pisada do cabalo será a mesma en toda a superficie, obtendo o mesmo rebote, e a mesma amortiguación.

Quinto.-A contrastada experiencia da Federación Hípica Galega constitúe a mellor garantía para poder levar a cabo un plan de xestión realizable para o máximo aproveitamento das instalacións hípcas que comprendería:

- Xuño 2026: Celebración durante a 48ª Feira Internacional Semana Verde de Galicia (4 ó 7 de Xuño de 2026) de:
 - Concurso de Saltos Nacional 4 estrelas.
 - Inauguración oficial do Centro Hípico de Alto Rendemento.
- Xullo 2026:
 - Campionato e Copa Galega de Doma clásica con cabalos e concurso Nacional de Doma clásica.
 - Campionato e Copa Galega de Doma clásica con ponis.
- Agosto 2026:
 - Campionato e Copa Galega de Saltos de obstáculos con cabalos.
 - Campionato e Copa Galega de Saltos de obstáculos con ponis.
- Entre maio e decembro de 2026: Posta en marcha do:
 - Centro de formación e reciclaxe de xuíces e técnicos.
 - Centro de tecnificación da Federación Hípica Gallega para as categorías de menores nas disciplinas de Saltos con obstáculos e Doma clásica.



- Centro de entrenamentos programados a disposición dos 60 clubs que forman parte da Federación Hípica Gallega.
- Centro de entrenamentos programados dos criadores de cabalos de deporte que forman parte da Federación Hípica Gallega.

●Año 2027 e posteriores: Ás actividades descritas para o 2026 sumaranse outros concursos e proxectos entre os que cabe destacar:

- Tres concursos de saltos nacionais 2 estrelas
- Concurso nacional de Doma clásica
- Concurso de Saltos Internacionais – Circuito Luso – Galaico
- Copa Ástur – Galaica de Saltos de obstáculos

Sexto. Correspondéndolle á Consellería de Presidencia, Xustiza e Deportes, as competencias de elaboración, proposta e execución da política do goberno galego en materia de deportes, conforme ao establecido no Decreto 136/2024, do 20 de maio (DOG núm. 101, do 27 de maio), polo que se fixa a estrutura orgánica da Consellería de Presidencia, Xustiza e Deportes.

Así mesmo, o artigo 6 da Lei 3/2012, do 2 de abril, do deporte de Galicia, establece que para o mellor exercicio das súas competencias, a Administración autonómica poderá subscribir convenios de colaboración coas demais administracións públicas e entidades públicas e privadas vinculadas á actividade deportiva.

A Consellería de Presidencia, Xustiza e Deportes, considera de interese público e social os obxectivos que se pretenden como unha acción máis do fomento do deporte en Galicia, polo que este convenio de colaboración responde a ese interese para cuxa consecución se fai precisa a execución dunha actuación imprescindible para poder celebrar os eventos hípicos e as competicións.

Os obxectivos descritos e a relevancia das actuacións para a súa consecución acreditan a existencia de razóns de interese económico que xustifican o feito de recorrer ao procedemento excepcional de concesión directa dunha subvención a favor da Fundación Semana Verde de Galicia.

Sétimo. Conforme co establecido no artigo 26.2º da Lei 9/2007, do 13 de xuño, de subvencións de Galicia, faise constar que neste convenio non son de aplicación os principios de publicidade e concorrencia pública, xa que o obxecto do convenio é atender as circunstancias específicas desta Fundación para a promoción do deporte mediante as actuacións que comprende o presente convenio.

Octavo. A Fundación Semana Verde de Galicia cumpre cos requisitos para obter a condición de beneficiario da subvención de acordo co disposto no artigo 10 da Lei 9/2007, do 13 de xuño, de subvencións de Galicia.

Noveno. A achega económica da Xunta de Galicia farase efectiva con cargo á aplicación orzamentaria 05.01.121A.781.0 (código de proxecto 2015 00121) na que existe crédito adecuado e suficiente.

Décimo. Con base en todo o anterior, co fin de materializar a colaboración antes descrita e ao considerar que concorren as circunstancias que así o aconsellan, a Consellería de Presidencia, Xustiza e Deportes e a Fundación Semana Verde de Galicia acordan subscribir este convenio de colaboración, de conformidade coas seguintes



CLÁUSULAS

Primeira. Obxecto.

O obxecto do presente convenio é fixar as liñas de colaboración entre a Consellería de Presidencia, Xustiza e Deportes e a Fundación Semana Verde de Galicia para mellorar as instalacións hípcas exteriores do Recinto Internacional de Galicia para a realización de competicións efectuando a seguinte actuación, cuxo orzamento é de **DEZAOITO MIL VINTE E NOVE EUROS (18.029,00 €)**, o cal se xunta como Anexo I a este convenio, do cal forma parte:

-Elaboración do proxecto técnico e dirección das obras que resulten do dito proxecto.

Segunda. Obrigas da Fundación Semana Verde de Galicia.

Ademais das establecidas con carácter xeral na Lei 9/2007, do 13 de xuño, de subvencións de Galicia, e na súa normativa de desenvolvemento, son obrigas da FSVG:

1. Cumprir o obxectivo, executar o proxecto, realizar a actividade ou adoptar o comportamento que fundamenta a concesión da subvención.
2. Destinar os fondos que se perciban á execución do proxecto para o cal se concede esta subvención, executar as actuacións que constitúen o obxecto deste convenio e cumprir todas as condicións e obrigas recollidas nel.
3. Xustificar ante o órgano concedente o cumprimento da finalidade da subvención, a realización da actividade ou adopción do comportamento que fundamentou a súa concesión e o seu custo real, no prazo e na forma establecidos neste convenio e demais normativa de aplicación.
4. Reintegrar, total ou parcialmente, as cantidades percibidas, se as houbera, xunto cos xuros de demora correspondentes, segundo o procedemento establecido no artigo 38 da Lei de subvencións de Galicia, nos seguintes supostos:
 - a. Incumprimento das condicións establecidas para a concesión da subvención e para a correcta execución e xustificación do proxecto subvencionado.
 - b. Incumprimento da obriga de xustificar a efectividade dos pagamentos nos termos da cláusula quinta deste convenio.
 - c. Reintegrarse o exceso de financiamento público polo importe pagado que exceda a cantidade resultante de aplicarlle ao gasto xustificado a porcentaxe de subvención correspondente, nos termos do artigo 21 do Decreto 11/2009, do 8 de xaneiro.
 - d. No suposto de que se produza exceso das subvencións percibidas de distintas entidades públicas respecto do custo do proxecto ou actividade, nos termos do artigo 23 do Decreto 11/2009, do 8 de xaneiro.
 - e. Incumprimento das obrigas establecidas no artigo 11 e 15 da Lei 9/2007, do 13 de xuño, de subvencións de Galicia.
 - f. Nos demais supostos de aplicación, nomeadamente os establecidos no artigo 33 da Lei 9/2007, do 13 de xuño.
5. Comunicarlle ao órgano concedente a obtención de subvencións, axudas, ingresos ou recursos que financien as actividades subvencionadas. Esta comunicación deberá efectuarse



no momento en que se coñeza e, en todo caso, con anterioridade á xustificación da aplicación

dada aos fondos percibidos.

6. Consentir expresamente a inclusión dos datos relevantes deste convenio nos rexistros públicos que proceda, conforme a disposición adicional do Decreto 132/2006, do 27 de xullo, polo que se regulan os rexistros públicos creados nos artigos 44 e 45 da Lei 7/2005, do 29 de decembro, dos orzamentos xerais da comunidade autónoma para o exercicio 2006 e o artigo 16 da Lei 9/2007, do 13 de xuño, de subvencións de Galicia.
7. Subministrarlle á Consellería de Presidencia, Xustiza e Deportes toda a información que se lle requira en materia de transparencia, de acordo co establecido no artigo 4 da Lei 1/2016, do 18 de xaneiro, de transparencia e bo goberno.
8. Colaborar e facilitar canta documentación lle sexa requirida, no exercicio das funcións de control que lle corresponden á Intervención Xeral da Comunidade Autónoma, ao Consello de Contas e ao Tribunal de Contas, así como someterse ás actuacións de supervisión e control previstas na Lei 9/2007, do 13 de xuño, de subvencións de Galicia, e ás xerais derivadas da aplicación da normativa de axudas e subvencións.
9. De conformidade co establecido no artigo 15.3 da Lei 9/2007, de 13 de xuño, de subvencións de Galicia e no artigo 20 do Decreto 11/2009 polo que se aproba o Regulamento que desenvolve a devandita Lei, a Fundación Semana Verde de Galicia deberá dar publicidade do carácter público da financiación da súa actividade. En particular, coa mención, nun lugar destacado do proxecto técnico, tanto do financiamento por parte da Xunta de Galicia como da súa imaxe institucional.

Terceira. Obrigas da Consellería de Presidencia, Xustiza e Deportes

A Xunta de Galicia, a través da Consellería de Presidencia, Xustiza e Deportes, cooperará na realización da actuación a que se refire a cláusula primeira deste convenio de colaboración, mediante a achega máxima de **DEZAOITO MIL VINTE E NOVE EUROS (18.029,00 €)** con cargo á aplicación orzamentaria 05.01.121A.781.0 (código de proxecto 2015 00121) dos orzamentos xerais da Comunidade Autónoma para o ano 2025. Este importe representa o 100% do orzamento total do proxecto que constitúe o obxecto deste convenio e que se achega como Anexo I.

No caso de que o investimento realizado teña un custo inferior ao inicialmente previsto e sempre que isto non supoña unha realización deficiente da totalidade do proxecto, a contía da subvención reducirase proporcionalmente, e manterase constante a porcentaxe da axuda respecto ao custo total do investimento.

Cuarta. Gastos subvencionables

Ao abeiro deste convenio poderán financiarse os gastos en que incorrese a FSVG como consecuencia da realización de actuacións acordes co seu obxecto, mesmo aqueles que se efectuasen con anterioridade á sinatura deste, sempre que se trate de gastos correspondentes ao actual exercicio económico.

Quinta. Conta xustificativa

1. Para recibir o importe da subvención e para xustificar a aplicación dos fondos percibidos, a FSVG deberá acreditar a execución do proxecto subvencionado mediante a presentación da seguinte documentación:

- a) Unha relación clasificada dos gastos e investimentos da actividade, con identificación do acredor e do documento, o seu importe, data de emisión e, no seu caso, data de pago.



- b) Facturas ou documentos de valor probatorio equivalente no tráfico xurídico-mercantil ou con eficacia administrativa incorporados na relación á que se fai referencia no apartado anterior e da documentación acreditativa do pago.
- c) Declaración responsable asinada electrónicamente pola representante da entidade beneficiaria, na cal se faga constar:
 - persoa O conxunto de todas as axudas solicitadas ou concedidas, para as mesmas actuacións solicitadas ao abeiro deste convenio, das distintas administracións públicas competentes ou outros entes públicos e o compromiso de comunicar decontado cantas axudas solicite e/ou obteña doutras administracións públicas ou doutros entes públicos ou privados, nacionais ou internacionais, a partir da data desta declaración.
 - Que a FSVG non está incurso en ningunha das prohibicións establecidas no artigo 10, números 2 e 3, da Lei 9/2007, do 13 de xuño, de subvencións de Galicia, para obter a condición de beneficiario dunha subvención.
 - Que non é debedor por resolución de procedemento de reintegro.
- d) Acreditación do cumprimento das obrigas tributarias, coa Seguridade Social, e de non ter pendente de pagamento débedas coa administración pública da comunidade autónoma de conformidade co establecido nos artigos 10 e 11 do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia.
- e) Acreditación do cumprimento da obriga de presentar as contas anuais ao protectorado para a súa anotación e depósito no Rexistro de Fundacións de Interese Gallego de acordo co disposto no artigo 38 da Lei 12/2006, de 1 de decembro, de fundacións de interese galego.

Á vista desta documentación o órgano competente da Consellería de Presidencia, Xustiza e Deportes expedirá certificación acreditativa do cumprimento por parte da fundación e dentro dos prazos establecidos, dos requisitos exixidos neste convenio para proceder ao pagamento da subvención.

2. A Secretaría Xeral Técnica da Consellería de Presidencia, Xustiza e Deportes poderá solicitar calquera outra documentación necesaria para a correcta verificación da subvención.

3. A data límite para a execución das actuacións subvencionadas e para presentar a documentación xustificativa da subvención será o 18 de novembro de 2025.

4. A falta de presentación da xustificación no prazo indicado comportará a perda do dereito ao cobramento da subvención e demais responsabilidades establecidas na Lei de subvencións de Galicia, sen prexuízo do previsto nos artigos 45.2 e 46 do Decreto 11/2009, do 8 de xaneiro.

O pago da subvención realizarase unha vez comprobada a xustificación presentada polo beneficiario e pola parte proporcional da contía da subvención efectivamente xustificada.

Sexta. Revogación, reintegro e resolución

A axuda concedida ao amparo deste convenio poderá ser obxecto de revogación ou reintegro, xunto cos xuros de demora, cando concorran as circunstancias previstas nos artigos 32 e 33 da Lei 9/2007, do 13 de xuño, de subvencións de Galicia, nos artigos 74 e seguintes do Decreto 11/2009, do 8 de xaneiro, polo que se aproba o Regulamento da lei de subvencións de Galicia e na Lei 38/2003, do 17 novembro, xeral de subvencións.



Será causa de reintegro total o incumprimento das obrigas establecidas para a Fundación Semana Verde de Galicia nas cláusulas deste convenio.

Sétima. Compatibilidade con outras subvencións

Esta axuda é compatible coa obtención doutras subvencións, axudas, ingresos ou recursos doutras entidades para a mesma finalidade procedentes de calquera Administración ou entes públicos ou privados, nacionais, da Unión Europea ou de organismos internacionais, sempre que a contía total das axudas non supere o 100% do importe da actividade subvencionada. No caso de que a subvención concedida supere, illadamente ou en concorrencia con outras, o custo da actividade para a que foi concedida a subvención, descontarase o exceso obtido sobre o citado custo.

Octava. Facultades de inspección

A Consellería de Presidencia, Xustiza e Deportes, a través dos seus servizos técnicos reserva para si a facultade de realizar as inspeccións e comprobacións que considere necesarias co fin de asegurar o cumprimento das normas e dos requisitos con que se concede esta axuda.

Novena. Seguimento do convenio

1. Para facilitar o seguimento, o cumprimento e a coordinación do convenio, poderase constituír unha comisión mixta de seguimento, integrada por un representante da Secretaría Xeral Técnica e un representante da Fundación.
2. A comisión poderase reunir as veces que se estime oportunas para o cumprimento do convenio. En todo caso, a solución das incidencias que poidan xurdir estará condicionada polas

limitacións orzamentarias incluídas na cláusula segunda.

3. As súas funcións serán:

- Interpretación do convenio
- Estudar as posibles modificacións do convenio propostas polas partes, as cales se formalizarán a través das correspondentes addendas.
- Velar polo cumprimento dos fins previstos neste convenio.
- Realizar un seguimento das actuacións e/ou actividades incluídas no presente convenio.
- Estudar e propoñer, de ser o caso, calquera medida que, en relación cos fins do presente convenio, redunde no beneficio dos obxectivos perseguidos co mesmo.
- Emitir informe respecto de calquera dúbida que se suscite na interpretación e /ou aplicación deste convenio.
- Intervención previa á resolución por incumprimento.

Décima. Causas de resolución





1. Este convenio extinguirase polo cumprimento das actuacións que constitúen o seu obxecto ou por incorrer en causa de resolución.
2. Son causas de resolución:
 - a) O incumprimento total ou parcial dalgunha das estipulacións que o regulan.
 - b) O transcurso do tempo fixado sen que se executen e/ou xustifiquen as actuacións obxecto da subvención ou sen se ter acordado a súa prórroga.
 - c) O acordo unánime de todas as partes asinantes.
 - d) Decisión xudicial declaratoria da nulidade do convenio.
 - e) Calquera outra causa prevista nas leis.

Décimo primeira. Vixencia do convenio

Sen prexuízo do establecido na cláusula cuarta, o presente convenio entrará en vigor o día da súa sinatura e estenderá a súa vixencia ata o 31 de decembro de 2025.

Décimo segunda. Natureza do convenio

O presente convenio ten natureza administrativa e as discrepancias que xurdan pola súa aplicación serán resoltas, logo de informe ou proposta da Comisión de Seguimento, pola Consellería de Presidencia, Xustiza e Deportes; as partes quedarán suxeitas á xurisdición contencioso-administrativa para a resolución de calquera conflito que puidese xurdir na súa aplicación.

Décimo terceira Publicidade do convenio

1. As partes asinantes manifestan o seu consentimento para que os datos persoais que constan neste convenio, así como o resto das especificacións contidas nel, poidan ser publicados no Portal da transparencia e goberno aberto.
2. Este convenio será obxecto de publicación, de acordo co previsto na Lei 1/2016, do 18 de xaneiro, de transparencia e bo goberno da Administración pública galega. Así mesmo, incluírase no Rexistro Público de Axudas, Subvencións e Convenios, de conformidade co Decreto 132/2006, do 27 de xullo, polo que se regulan os rexistros públicos creados nos artigos 44 e 45 da Lei 7/2005, do 29 de decembro, de orzamentos xerais da Comunidade Autónoma de Galicia para o ano 2006, e mais co artigo 16 da Lei 9/2007, do 13 de xuño, de subvencións de Galicia.
3. En cumprimento do disposto nos artigos 18 e 20.8 da Lei 38/2003, do 17 de novembro, xeral de subvencións, comunicarase a subscrición deste convenio á Base de datos nacional de subvencións, que opera como sistema nacional de publicidade de subvencións.

Décimo cuarta. Protección de datos

As partes asinantes virán obrigadas en materia de protección de datos a cumprir co Regulamento (UE) 2016/679 do Parlamento europeo e do Consello, de 27 de abril de 2016, relativo á protección das persoas físicas no que respecta ao tratamento de datos persoais e á libre circulación destes datos e polo que se derroga a Directiva 95/46 CE (Regulamento xeral de protección de datos) e demais disposicións vixentes sobre a materia.



Décimo quinta. Normativa aplicable

En todo o non previsto expresamente polo presente convenio estarase ao disposto na Lei 9/2007, do 13 de xuño, de subvencións de Galicia, no Decreto 11/2009, do 8 de xaneiro, polo que se aproba o Regulamento da Lei de subvencións, e demais normativa de aplicación.

En proba de conformidade co expresado neste convenio, as partes comparecentes asinan na data consignada na sinatura electrónica.

Conselleiro de Presidencia, Xustiza e
Deportes

Director Xeral da Fundación Semana
Verde de Galicia

Diego Calvo Pouso

Ricardo José Durán Rodríguez



Anexo I

Redacción do Proxecto Técnico e Dirección de Obra	
Redacción do Proxecto Técnico	9.900 €
Dirección de Obra e Dirección de Execución	4.000 €
Coordinación de Seguridade e Saúde	1.000 €
Total sen IVE	14.900 €
IVE 21%	3.129 €
Total con IVE	18.029 €

